

Data	Testata	Edizione	Pagina
01.04.2015	Il Quotidiano	CZ	16

U mèrcuri ammenzu 'a simana

Ah, si non ci fussera Rai Regiona



di ENZO COLACINO

L'HAJU sempa dittu : si non ci fussera 'a televisiona , passèramu jurnati sani davanti u frigoriferu! 'A televisiona e ormai è comu na calamita, si cci faciti casu quandu on c'è correnta 'a prima cosa cchi si fa è 'ma t'assetti e 'ma l'appiccichi. 'A cosa cchjù incredibile è ca ormai si ciàngia a tutti i programmi. Ni fanu ciangira ccu i programmi d'a cucina quandu sbàglianu i cuochi, ccu i provini d'e cantanti quandu su' promossi, senza cuntara d'o lavinaru cchi ni fanu fara quandu lèjanu 'a littera 'e "c'è posta per te". Cchjù a l'affrittu 'e turnu cci trema u gangaleddhu e cchjù cci minanu quasi fina cchi u fanu scattara. Ormai non ciangìmu cchjù davanti a sciaguri aerei a omicidii e stragi ppecchì diventaru 'a normalità e sunnu pana quotidianu ppe' i programmi duva criminologi, giornalisti e saputuni fannu bella mostra d'e paroli cchi sannu dira a la faccia d'o dolura cchi hannu i familiari. Politica nazionala mancu 'ma nda parramu, ogni politico 'a vida a modu soi e cci sunnu armenu 300 versioni diversi 'e na notizia. Menu mala ca però 'a mati-

na subba Rai Regiona d'a Calabria cci sunnu cchiddhi belli immagini d'e webcam cchi ni dicianu in anteprima si u mara a Coriglianu è agitato o si c'è ventu a Reggio ppecchì si motica na parmara, senza cuntara quandu ni fannu sapira ca Camigliatellu si incomincia a svegliare ppecchì si vida passara na màchina! Poi cci sunnu chiddhi bellissimi collegamenti ccu l'Arpacal e 'a Polizia Stradala cchi ti fannu affruntara 'a jornata ccu cchjù sicurezza. Comu programma comicu non c'è cchi dira. Cci fa sulu concorrenza 'a mastranza politica 'e Catanzaru cchi quantu prima puru ppemma rispàrma subba i spettacoli 'e varietà sta preparandu na serie 'e "Oggi le comiche" ccu protagonisti tutti chiddhi personaggi cchi ppe' visibilità, liccaru cu portau a ssi condizioni ssa Regiona e mo a na vota vidanu i mulini a ventu, e cèrcanu 'ma dùnanu 'a curpa a chissu e a chiddhu. Nu picculu signala 'e risvegliu para ca c'è: i segnalazioni d'e disservizi d'e Catanzarisi sani superannu i comunicati e i proclami 'e l'operi fatti. Catanzaru è piccula e ni canuscimu tutti comu u tri dinari.

© RIPRODUZIONE RISERVATA